

lados cando a xestión documental que teña lugar neles o aconselle. Noutro caso, se se tivese constituído a comisión no ministerio correspondente, os organismos públicos estarán representados nela.

3. A constitución e o funcionamento da comisión serán atendidos cos actuais medios persoais e materiais do departamento ou organismo sen que a aprobación desta norma supoña incremento de gasto público.

Disposición derradeira primeira. *Desenvolvemento e execución do real decreto.*

Autorízase os ministros de Educación, Cultura e Deporte, de Defensa, de Facenda e de Administracións Públicas para o desenvolvemento e execución deste real decreto, no ámbito das súas respectivas competencias, e de igual modo ós titulares dos distintos departamentos ministeriais no que concirne a eles e ós organismos públicos vinculados ou dependentes de cada un deles.

Disposición derradeira segunda. *Entrada en vigor.*

Este real decreto entrará en vigor o día seguinte ó de su publicación no «Boletín Oficial del Estado».

Dado en Madrid o 8 de novembro de 2002.

JUAN CARLOS R.

O vicepresidente primeiro do Goberno
e ministro da Presidencia,
MARIANO RAJOY BREY

MINISTERIO DE AGRICULTURA, PESCA E ALIMENTACIÓN

22544 REAL DECRETO 1135/2002, do 31 de outubro, relativo ás normas mínimas para a protección de porcos. («BOE» 278, do 20-11-2002.)

O Convenio europeo do 10 de marzo de 1976, ratificado por España mediante Instrumento do 21 de abril de 1988, recolle as normas mínimas sobre protección de animais en explotacións gandeiras.

A Unión Europea, ante a necesidade de establecer normas mínimas comúns para a protección dos porcos de cría e de engorde, e co fin de evitar na medida do posible sufrimentos e incomodidades excesivas a estes animais nos modernos sistemas de explotación, adoptou a Directiva 91/630/CEE, do Consello, do 19 de novembro de 1991, relativa ás normas mínimas para a protección de porcos, trasposta ó ordenamento xurídico interno por medio do Real decreto 1048/1994, do 20 de maio, relativo ás normas mínimas para a protección de porcos.

De conformidade co artigo 6 da citada Directiva 91/630/CEE, a Comisión presentou un informe sobre os sistemas de cría intensiva de porcos. O dictame do Comité Científico Veterinario do 30 de setembro de 1997 sinala que os porcos deben vivir nun contorno que se axuste ás súas necesidades de exercicio e comportamento exploratorio e que unha importante limitación de espazo compromete o seu benestar. Como resultado deste dictame e considerando que é necesario manter un equilibrio entre os diferentes aspectos que han

de tomarse en consideración no que se refire ó benestar, incluída a sanidade, e factores económicos e sociais, ademais do impacto ambiental, o Consello da Unión Europea adoptou a Directiva 2001/88/CE, do 23 de outubro de 2001, pola que se modifica a Directiva 91/630/CEE, relativa ás normas mínimas para a protección de porcos, que cómpre incorporar ó ordenamento xurídico español.

Por outra parte, o Real decreto 348/2000, do 10 de marzo, polo que se incorpora ó ordenamento xurídico a Directiva 98/58/CE, relativa á protección dos animais nas explotacións gandeiras, establece as disposicións comunitarias aplicables a tódolos animais de granxa sobre as características dos cortellos, as condicións de illamento, calefacción, ventilación, a inspección do equipamento e do gando. A Comisión Europea considerou oportuno incluír estas materias no anexo da Directiva 91/630/CEE no caso dos porcos, por medio da Directiva 2001/93/CE da Comisión, do 9 de novembro de 2001, pola que se modifica a Directiva 91/630/CEE relativa ás normas mínimas para a protección de porcos, a cal é tamén necesario incorporar ó ordenamento xurídico español.

Procédese, polo tanto, á incorporación da Directiva 2001/88/CE e da Directiva 2001/93/CE, anteriormente citadas, ó ordenamento xurídico español. Para unha maior claridade e seguridade xurídica considerouse conveniente derroga-lo Real decreto 1048/1994 e promulgar unha nova norma.

Na elaboración deste real decreto foron consultadas as comunidades autónomas e os sectores afectados.

Na súa virtude, por proposta do ministro de Agricultura, Pesca e Alimentación, de acordo co Consello de Estado e logo de deliberación do Consello de Ministros na súa reunión do día 31 de outubro de 2002,

DISPŪO:

Artigo 1. *Obxecto.*

Este real decreto establece as normas mínimas para a protección de porcos confinados para a cría e o engorde.

Artigo 2. *Definicións.*

Para efectos deste real decreto, entenderase por:

1. «Porco»: animal da especie porcina de calquera idade, tanto se se cría con vistas á reprodución como ó engorde.
2. «Verrón»: animal macho da especie porcina despois da puberdade e que se destina á reprodución.
3. «Porca nova»: animal femia da especie porcina trala puberdade e antes do parto.
4. «Porca»: animal femia da especie porcina despois do primeiro parto.
5. «Porca en lactación»: porca entre o período perinatal e a desteta dos leitóns.
6. «Porca posdesteta e porca xestante»: porca entre a desteta e o período perinatal.
7. «Leitón»: porco desde o nacemento á desteta.
8. «Bacoriño destetado»: porco non lactante de ata dez semanas de idade.
9. «Porco de produción»: porco de máis de dez semanas de idade, ata o sacrificio ou a monta.
10. «Autoridade competente»: son autoridades competentes a Administración xeral do Estado e os órganos competentes das comunidades autónomas nos seus ámbitos respectivos.

Artigo 3. *Condicións de cría nas explotacións de porcos.*

Tódalas explotacións deberán cumprilo requisitos seguintes, ademais dos establecidos no anexo:

1. A superficie de chan libre da que deberá dispor cada bacoriño destetado ou porco de produción criado en grupo, excluídas as porcas e as porcas novas despois da cubrición, será, polo menos, de:

Peso en vivo (en quilogramos)	Metros cadrados
Ata 10	0,15
Entre 10 e 20	0,20
Entre 20 e 30	0,30
Entre 30 e 50	0,40
Entre 50 e 85	0,55
Entre 85 e 110	0,65
Máis de 110	1,00

2. A superficie total de chan libre da que deberá dispor cada porca, ou cada porca nova despois da cubrición, cando se críen nun grupo, será, polo menos, de 2,25 metros cadrados e 1,64 metros cadrados, respectivamente. Cando estes animais se críen en grupos inferiores a seis individuos, a superficie de chan libre incrementarase nun 10 por 100. Cando os animais se críen en grupos de 40 individuos ou máis, a superficie de chan libre poderase diminuír un 10 por 100.

3. O revestimento do chan axustarase ós seguintes requisitos:

A) Para as porcas novas despois da cubrición e as porcas xestantes: unha parte da superficie estipulada no punto 2 deste artigo, que será, como mínimo, de 0,95 metros cadrados por porca nova e de 1,3 metros cadrados por porca, deberá ser de piso continuo compacto, do que o 15 por 100, como máximo, se reservará ás aberturas de drenaxe.

B) Cando se utilicen chans de formigón engrellados para porcos criados en grupos:

a) A largura das aberturas será dun máximo de 11 mm, para leitóns; para bacoriños destetados, 14 mm; para porcos de produción, 18 mm; para porcas e porcas novas despois da cubrición, 20 mm.

b) A largura das viguetas será dun mínimo de 50 mm para leitóns e bacoriños destetados e 80 mm para porcos de produción, porcas e porcas novas despois da cubrición.

4. As porcas e porcas novas criaranse en grupos durante o período comprendido entre as catro semanas seguintes á cubrición e os sete días anteriores á data prevista de parto. Os lados do recinto no que se manteña o grupo medirán máis de 2,8 metros. Cando se críen nun grupo de menos de seis individuos, os lados do recinto medirán máis de 2,4 metros. As condicións deste parágrafo non se aplicarán ás explotacións que contén con menos de dez porcas.

Non obstante o disposto no parágrafo anterior, as porcas e porcas novas criadas en explotacións de menos de 10 porcas poderán manterse illadas durante o período comprendido entre as catro semanas seguintes á cubrición e os sete días anteriores á data prevista de parto sempre que poidan da-la volta facilmente no recinto en que se encontrén.

5. Sen prexuízo dos requisitos previstos no anexo deste real decreto, as porcas e porcas novas deberán dispor de acceso permanente a materiais manipulables

que se axusten, como mínimo, ós requisitos pertinentes do mencionado anexo.

6. Os porcos que haxa que criar en grupos, pero sexan particularmente agresivos, fosen atacados por outros porcos ou estean enfermos ou feridos poderán manterse temporalmente en recintos individuais.

Nos casos especiais descritos anteriormente, o recinto que se utilice deberá permitir que o animal poida da-la volta facilmente, sempre que isto non sexa contrario a consellos veterinarios específicos.

7. As porcas e porcas novas mantidas en grupos alimentaranse mediante un sistema que garanta que cada animal poida comer suficientemente, aínda en presenza doutros animais que compitan pola comida.

8. Para calma-la súa fame, e dada a necesidade de mastigar, tódalas porcas novas, porcas posdesteta e porcas xestantes deberán recibir unha cantidade suficiente de alimentos de volume ou ricos en fibras, así como alimentos cun elevado contido enerxético.

9. O resto das condicións relativas á cría de porcos serán conformes coas disposicións xerais que figuran no anexo.

10. Prohíbese a construción ou o acondicionamento de instalacións nas que se ate ás porcas e porcas novas.

Así mesmo, queda prohibido o uso de ataduras para as porcas e porcas novas.

Artigo 4. *Control.*

1. O control do cumprimento das normas contidas neste real decreto será realizado pola autoridade competente das comunidades autónomas, que para este fin efectuará as inspeccións precisas, remitindo ó Ministerio de Agricultura, Pesca e Alimentación, antes do 31 de marzo de cada ano, un informe sobre o resultado das inspeccións realizadas o ano precedente, co fin de que o Ministerio de Agricultura, Pesca e Alimentación informe a Comisión Europea, conforme o disposto na lexislación comunitaria.

2. Estas inspeccións, que poderán realizarse con ocasión de controis efectuados con outros fins, cubrirán anualmente mostras estatisticamente representativas dos distintos sistemas de cría do territorio de cada comunidade autónoma.

3. Para efectos do previsto nos puntos anteriores, o Ministerio de Agricultura, Pesca e Alimentación elaborará, en colaboración coas comunidades autónomas, un plan anual de controis, que incluírá, polo menos, a determinación do tamaño da mostra que deberá ser obxecto de inspección en cada comunidade autónoma, así como os criterios básicos para a súa elección.

Artigo 5. *Formación do persoal.*

1. Toda persoa que empregue ou contrate persoal encargado do coidado dos porcos deberá asegurarse de que este persoal recibise as instrucións e o asesoramento debidos sobre as disposicións pertinentes a que se refire o artigo 3 e o anexo deste real decreto.

2. Con tal fin, as autoridades competentes das comunidades autónomas aseguraranse de que se realice a formación a que se refire o punto anterior mediante cursos que terán unha duración mínima de vinte horas e incluírán, polo menos, contidos teóricos e prácticos sobre fisioloxía animal, comportamento animal, conceptos xerais de sanidade animal e lexislación vixente en materia de benestar animal.

c

Artigo 6. Importacións de países terceiros.

Para seren importados no territorio español, os animais procedentes dun país terceiro deberán ir acompañados dun certificado expedido pola autoridade competente dese país, que certifique que se beneficiaron dun trato polo menos equivalente ó concedido ós animais de orixe comunitaria, tal como se establece neste real decreto.

Artigo 7. Inspeccións comunitarias.

1. No suposto de que expertos veterinarios da Comisión Europea realicen controis sobre o terreo para garantir a aplicación correcta e uniforme deste real decreto, a autoridade competente das comunidades autónomas e as do Ministerio de Agricultura, Pesca e Alimentación, no ámbito das súas respectivas competencias, facilitaránlle a asistencia necesaria para o cumprimento das súas funcións. Para tal efecto, representantes do citado departamento poderán acompañalos ditos expertos.

Para isto, os inspectores deberán aplicar a si mesmos as medidas de hixiene especiais necesarias para excluír todo risco de transmisión de enfermidades.

A autoridade competente das comunidades autónomas e, se é o caso, da Administración xeral do Estado tomará as medidas que puidesen resultar necesarias para ter en conta os resultados da dita inspección.

2. Polo que respecta ás relacións cos países terceiros, aplicaranse as disposicións dos artigos 18, 19 e 20 do Real decreto 1430/1992, do 27 de novembro, polo que se establecen os principios relativos á organización de controis veterinarios e de identidade dos animais que se introduzan na comunidade procedentes de países terceiros.

Artigo 8. Incumprimentos e sancións.

O incumprimento do previsto neste real decreto será sancionado de acordo co disposto na normativa vixente aplicable en cada caso.

Disposición derogatoria única. Derrogación normativa.

A partir da data de entrada en vigor deste real decreto, queda derogado o Real decreto 1048/1994, do 20 de maio, relativo ás normas mínimas para a protección de porcos e cantas disposicións de igual ou menor categoría se opoñan a este real decreto.

Disposición derradeira primeira. Carácter básico e título competencial.

Este real decreto ten carácter básico e dítase ó abeiro do disposto no artigo 149.1.13.^a e 16.^a da Constitución, polos que se lle atribúe ó Estado a competencia exclusiva en materia de bases e coordinación da planificación xeral da actividade económica e bases e coordinación xeral da sanidade, respectivamente, excepto no seu artigo 6 e no punto 2 do artigo 7, que se dictan ó abeiro do artigo 149.1.10.^a e 16.^a da Constitución, que lle atribúen ó Estado competencia exclusiva sobre comercio exterior e sanidade exterior, respectivamente.

Disposición derradeira segunda. Facultade de aplicación.

Facúltase o ministro de Agricultura, Pesca e Alimentación para dictar, no ámbito das súas competencias, as disposicións que sexan necesarias para a aplicación do disposto neste real decreto, así como para a modificación do anexo, cando resulte necesario en caso de modificación da normativa comunitaria.

Disposición derradeira terceira. Entrada en vigor.

Este real decreto entrará en vigor o 1 de xaneiro de 2003, coas seguintes excepcións:

1. As condicións establecidas nos puntos 2, 3, 4, 5, e no segundo parágrafo do punto 6 do artigo 3, aplicaranse:

1.º A tódalas explotacións que se constrúan ou reconstrúan ou que comecen a utilizarse por primeira vez con posterioridade ó 1 de xaneiro de 2003,

2.º A tódalas explotacións a partir do 1 de xaneiro de 2013.

2. A prohibición establecida no segundo parágrafo do punto 10 do artigo 3, será esixible a partir do 1 de xaneiro de 2006.

3. As condicións de espazo das instalacións para verróns descritas no segundo parágrafo da alínea A) do capítulo II do anexo, aplicaranse:

1.º A partir do 1 de xaneiro de 2003 a tódalas explotacións que se constrúan ou reconstrúan ou que comecen a utilizarse por primeira vez a partir da dita data.

2.º A tódalas explotacións a partir do 1 de xaneiro de 2005.

Dado en Madrid o 31 de outubro de 2002.

JUAN CARLOS R.

O ministro de Agricultura, Pesca e Alimentación,
MIGUEL ARIAS CAÑETE

ANEXO**CAPÍTULO I****Condicións xerais**

Ademais das disposicións correspondentes do anexo do Real decreto 348/2000, do 10 de marzo, polo que se incorpora ó ordenamento xurídico a Directiva 98/58/CE, relativa á protección dos animais nas explotacións gandeiras, deberán cumprirse os requisitos seguintes:

1. Na parte do edificio na que se encontren os porcos evitaranse niveis de ruído continuo superiores a 85 dBe, así como ruídos duradeiros ou repentinos.

2. Os porcos deberán estar expostos a unha luz dunha intensidade mínima de 40 lux durante un período mínimo de oito horas ó día.

3. Os locais de estabulación para os porcos construíranse de forma que os animais poidan:

a) Ter acceso a unha área de repouso, comfortable desde o punto de vista físico e térmico, adecuadamente drenada e limpa, que permita que tódolos animais se deiten ó mesmo tempo.

b) Descansar e erguerse normalmente,

c) Ver outros porcos; sen embargo, na semana anterior ó momento previsto do parto e durante este, as porcas e as porcas novas poderán manterse fóra da vista dos animais da súa mesma especie.

4. Sen prexuízo do disposto no punto 5 do artigo 3, os porcos deberán ter acceso permanente a unha cantidade suficiente de materiais que permitan unhas adecuadas actividades de investigación e manipulación como palla, feo, madeira, serraduras, compost de champiñóns, turba ou unha mestura deles, que non comprometa a saúde dos animais.

5. Os chans serán lisos, pero non esvaradíos, para evitar danos ós porcos e deseñaranse, construíranse e coidaranse de forma que non causen dano ou sufrimento

ós porcos. Serán adecuados ó tamaño e ó peso dos porcos e, se non se equipan con leitós de palla, formarán unha superficie ríxida, plana e estable.

6. Tódolos porcos serán alimentados, polo menos, unha vez ó día. Cando os porcos se alimenten en grupos e non á vontade, ou mediante un sistema automático de alimentación individual, cada porco terá acceso ó alimento ó mesmo tempo que os demais animais do grupo.

7. Tódolos porcos de máis de dúas semanas de idade terán acceso permanente a unha cantidade suficiente de auga fresca.

8. Prohibiranse tódolos procedementos non debidos a motivos terapéuticos ou de diagnóstico, ou destinados á identificación dos porcos de conformidade coa normativa pertinente e que provoquen lesións ou a perda dunha parte sensible do corpo ou a alteración da estrutura ósea, coas excepcións seguintes:

a) Unha redución uniforme das puntas dos dentes dos leitóns mediante o pulido ou sección parcial, antes de que superen os sete días de vida, deixando unha superficie lisa intacta; en caso necesario pode reducirse a lonxitude dos caíños dos verróns para evitar lesións a outros animais ou por razóns de seguridade.

b) A rabenadura parcial.

c) A castración dos porcos macho por medios que non sexan o desgarre de tecidos.

d) O anelado do fociño unicamente cando os animais se manteñan en sistemas de cría ó aire libre e de acordo coa normativa nacional.

A rabenadura e a redución das puntas dos dentes non deberán executarse por rutina senón unicamente cando existan probas de que se produciron lesións dos tetos das porcas ou as orellas ou rabos doutros porcos. Antes da súa execución, adoptaranse medidas para previla caudofaxia e outros vicios tendo en conta as condicións ambientais e a carga gandeira. Por esta razón, as condicións ambientais ou os sistemas de xestión deberán modificarse se resultan inadecuados.

Soamente un veterinario ou unha persoa formada, tal como se recolle no artigo 5 deste real decreto, con experiencia na execución das técnicas aplicadas poderá realizar cos medios adecuados e en condicións hixiénicas calquera dos procedementos descritos anteriormente. En caso de que a castración ou a rabenadura se realicen a partir do sétimo día de vida levaranse a cabo unicamente mediante unha anestesia e unha analxesia prolongada practicada por un veterinario.

CAPÍTULO II

Disposicións específicas para as distintas categorías de porcos

A) Verróns.

As celas de verróns estarán situadas e construídas de forma que os verróns poidan da-la volta, oír, ulir e ve-los demais porcos. A zona de chan libre de obstáculos á disposición dun verrón adulto deberá ser, como mínimo, de 6 metros cadrados.

Cando os recintos tamén se utilicen para a cubrición, a zona de chan á disposición dun verrón adulto deberá ser, como mínimo, de 10 metros cadrados e o recinto deberá estar libre de calquera obstáculo.

B) Porcas e porcas novas.

1. Adoptaranse medidas para minimiza-las agresións nos grupos.

2. En caso necesario, as porcas xestantes e as porcas novas deberán ser tratadas contra os parasitos inter-

nos e externos. En caso de acomodalas en parideiras, as porcas xestantes e as porcas novas deberán estar limpas.

3. Na semana anterior ó momento previsto do parto, as porcas e as porcas novas deberán dispor de material adecuado para face-lo cocho en cantidade suficiente a menos que sexa tecnicamente inviable con respecto ó sistema de esterco líquido utilizado no establecemento.

4. Detrás das porcas ou das porcas novas deberá acondicionarse un espazo libre para permitir un parto de forma natural ou asistida.

5. As celas de parto nas que as porcas poidan moverse libremente deberán contar con dispositivos de protección dos leitóns, como barrotes.

C) Leitóns.

1. Unha parte da superficie total do chan, suficiente para permitir que tódolos animais estean tombados ó mesmo tempo, deberá ser sólida ou estar revestida, ou estar cuberta cunha capa de palla ou calquera outro material adecuado.

2. Cando se utilice unha parideira, os leitóns deberán dispor de espazo suficiente para poder ser aleitados sen dificultade.

3. Os leitóns non deberán ser destetados antes de ter vinteito días de idade a non ser que o feito de non destetalos sexa prexudicial para o benestar ou a saúde da nai ou dos leitóns. Sen embargo, os leitóns poderán ser destetados ata sete días antes, se son trasladados a instalacións especializadas que se baleirarán, se limparán e desinfectarán meticulosamente antes de introducir un novo grupo e que estarán separadas das instalacións das porcas, para limita-la transmisión de enfermidades ós leitóns.

D) Bacoriños destetados e porcos de produción.

1. Cando os porcos se críen en grupos, adoptaranse medidas para previr pelexas que excedan do seu comportamento normal.

2. Os porcos deben manterse en grupos coa mínima mestura posible. Se teñen que mesturarse porcos non familiarizados entre si, a mestura debe facerse á idade máis temperá posible, preferiblemente antes da desteta ou, como moito, unha semana despois. Cando se mesturen os porcos, ofreceránselle-las oportunidades adecuadas de escapar e ocultarse doutros porcos.

3. Cando aparezan signos de pelexa violenta, investigarase inmediatamente as causas e adoptaranse as medidas adecuadas, como, por exemplo, ofrecer palla abundante ós animais, se fose posible, ou outros materiais para investigación. Os animais en perigo ou os agresores específicos manteranse separados do grupo.

4. O uso de tranquilizantes para facilita-la mestura limitarase a condicións excepcionais e unicamente con previa consulta cun veterinario.

XEFATURA DO ESTADO

22649 LEI 43/2002, do 20 de novembro, de sanidade vexetal. («BOE» 279, do 21-11-2002.)

JUAN CARLOS I

REI DE ESPAÑA

Saiban tódolos que a viren e a entenderen que as Cortes Xerais aprobaron e eu sanciono a seguinte lei.